

Crepes da lejenda, solidarietà e jent da mont

L'é chisc i temes de la scontrèda endrezèda dal Socors da Mont Auta Fascia e dal Val de Fascia Climbing con l'alpinist Fausto De Stefani, olache l'é stat recordà Alex, Diego, Erwin, Luca e Dimitri



Cianacei - Vindedò gregn orizonc, en prum pian i musc lumenousc de Alex, Diego, Erwin, Luca e Dimitri sui crepes o coi schi, moscé sul scherm de la sala conferenzes del chino de Cianacei col compagnament de na musega de gran emozione. Ai 16 de decembar l'enconter con l'alpinist Fausto De Stefani l'é pontà via con la lègremes serèdes tel col e chela forèda de dolor che se palesa danef, zenza redenziò, vigni outa che vegn recordà Dantone, Perathoner, Prinoth e Riz.

Te la sala l'era i familières di menacrepes, sepolli da na levina acà n an te la Val Lasties, de Dimitri Rizzi, mort endèna che l'ja te la neif en tria ai 7 de oril de chest an, n gran numer de joegn e i raprejentanc del Val de Fascia

Climbing e del Socors da Mont, che à metù a jir l'event.

I doi gropes à basà la serèda su alpinism, solidarietà e i cinch amisc bogn de desmostrer, te la forma più nòbola, sie amor per i crepes.

Na vita rica de altruism chela di menacrepes fascegn, metuda apede a chela de De Stefani. Cincantaot egn, da Mantova, De Stefani l'é un di pec che l'é ruà sun duc i 14 otmile de la Tera zenza ossigen. Ma, dò egn spenui a secodir la pascion che l'à portà più che na outa a tocà l'ciel del Nepal, l'alpinist del 2000 l'à scomenzà con la sociazion "Senza frontiere" a regoer fondi per realisèr, te la "terra degli dei", scoles, convic e n poliambulatorie. N projet che per l'alpinist à raprejentà "i crepes più auc e senestres, ma più bie". A l'òpera de gran valor de De Stefani,

president ence de Mountain Wilderness, i climbers e i socoridores fascegn a volù ge donèr


5 mile euro regoec en memoria di amisc che no i é più. Erwin Riz stimèa la scomenzadiva - l'à dit Stefano Bonello, president del Val de Fascia Climbing, ge dajan l'assegn - e nos ben bolintiera se aon dedicà deldut a chesta cauja.

Na donazion che didarà l' rescat sozièl de vèlch bez de Kirtipur. Zità pureta vejina a Kathmandu, olache l'é la scoles Rarahill Memorial. Te chesta scoles con tulins dal sorie, aules de chimica e computer, orc e na mensa che desc fora 480 bèsè en di, i bec studia per doventèr compagnadores eco-ambientèl, n lurier prezios per fèr cognoscer la richesces del Nepal: natura e

turism.

Enstadì donca l'é stat fat sù n pent anter i eroes de Fascia e chi bec salvé da la fam per n davegnir de speranza. E cosci a na vida scempia, i musc aiegres di picoi nepaleisc de De Stefani, moscé te n filmat de Sandro Tamanini a la fin de la serèda, i à chietà jù l dolor del scomenz, lascian l post a n gran sens de serenità. Complimenc a chi che à endrezà: Stefan Valentini, Mauro Dorigatti, Fabio Romelli, Matteo Soraperra, Jacopo Ferrari, Luca Micheluzzi, Mara Dorich e Stefano Bonello.

Elisa Salvi



Tel chino de Cianacei l'enconter con l'alpinist Fausto De Stefani à metù l'azent sul spirit del jir sa mont ma ence su la solidarietà.

Recordèr l'amor per la mont de Dimitri

Ta Cianacei ge é stat dedicà a Dimitri Rizzi na di de sport en segurezza per portèr inant e smaorèr la pascion del freestyle e che à dat l met de stèr duc ensema



Duc ensema se strenc te n braciacol apede a Giorgia e a Alessandro, fra de Dimitri. (foto Tomaso Luzzana)

Cianacei - L'é stat na di en onor de Dimitri Rizzi, chela endrezèda en domenìa ai 19 de decembar su la neives del Belvedere, dedichèda al freeride te duta sia variantes, pissèda dant da dut da Giorgia Lorenz e Roland Rasom.

A compagnèr l'grop de joegn che à tout pèrt l'é stat Roberto Platter menacrep, Roland Rasom per la brea, Patrick Rasom per l schi, Mauro Tarter e Stefano Martinello per l telemark.

Per slarièr fora l sport e la segurezza la di la é pontèda via alò da la Scuola de schi de Cianacei olache l'é stat fat l control del materièl. Sobito dò duc 9 i partezipanc i é jic sun Pecol olache l'é stat fat doi raides de sciudament per dapò se troèr duc ensema al ciamp base alò dal Ciampolin olache la guida Roberto Platter à tegnù na lezion de teoria generèla sui pericò del freeride e de canche se va a neif en tria e l ge à insegnà

co fèr te na condizion de pericol.

Dapò l'grop l'é stat spartì en doi e un a l'outa à podù fèr pratega te na esercitazion de enrescida sot la neif con la doura de l'arva. endèna che l'auter grop l'é jic a fèr na proa lijiera te la neif en tria. Dò che duc chenc se à endò ciarià de neva compagna con na bona marena en compagna se é endò pontè via coi schi per dut l domarena e entorn les 4 duc se à binà endò tedant a la scola de schi de Cianacei olache

sot la neif ti ciampes da schi tedant a la scola l'é stat sconet vèlch premie che se cognea jir a se chierir endò con l'arva.

Dut ch'est l'é stat fat con n obietif scempie ma prezis, chel de portèr inant e slarièr fora l spirit del freeride en segurezza, en recort de chel che aea scomenzà e che volea portèr inant Dimitri.

A la fin de la di no l'é mencià n picol moment ofizial te Scuola de schi, olache l'é stat reingrazià duc chi che à tout pèrt che i à palesà sia gran sodesfazion troan dassen de ütòl sibie la spiegazioni teoriches che la pratega. L gran reingraziament dapò l'é jic a duc chi che se à dat jù per portèr a compiment chesta bela di de festa per recordèr na persona spezièla e emportanta, che é semper tel recort de duc i amisc

e i coleges de la scola de schi che à volù ge fèr onor con chesta di. Da man de Mauro Tarter e del diretor Luciano Fosco l'é stat uzà fora la forza de chesta sort de scomenzadives che tras l recordèr e l rejonèr é bones de portèr inant te n spirit gaert n amor per la mont n muie gran e fon, che l se à palesà ch'est'outa a na vida n muie bela tras la pratega del freeride en segurezza e soraldut del stèr duc ensema.

La di se à serà sù con de bie premies dac fora tant ai joegn che ai maestres che se à dat jù per endrezèr, anter momenc de comozion, sodesfazion per l bon ejit de la di, e la speranza che l'an che vegn la podesse esser amò più grana e con amò più jent apede. (vr)



Maestres e amisc de Dimitri te la esercitazion su la doura de l'arva. (foto Tomaso Luzzana)